



AURENTINO ALONSO ARAUJO, deputado do Grupo Provincial Socialista na Deputación de Ourense, en base ao previsto na Lei de Bases Reguladora do Réxime Local, ó artigo 91 e 97, entre outros, da Regulación de Organización, Funcionamento e Réxime Xurídico das Entidades Locais e o Regulamento desta corporación presenta unha **MOCIÓN PARA GARANTIR UNHA XESTIÓN PROFESIONAL E TRANSPARENTE NA ESTACIÓN DE MONTAÑA DE MANZANEDA**.

A baixada de temperaturas e chuvias devolveron aos ourensáns ao pleno inverno durante a primeira fin de semana do mes de marzo, e deixaron novamente en evidencia as grandes eivas na xestión e organización da Estación de Montaña de Manzaneda. O temporal que azoutou a Península trouxo a neve ás cotas máis altas da provincia, sendo aproveitado polos seareiros dos deportes de inverno para acudir ata a estación de montaña ourensana, redundando no colapso dos seu servizos. As xornadas resultaron caóticas por mor de estradas cortadas polo paso tardío das máquinas quitaneves, atoamentos nos accesos de vehículos e dilatadas esperas dos clientes que pretendían acceder ás instalacións. A estes problemas xa recurrentes, que nin a Deputación de Ourense nin a Xunta de Galicia son quen de solucionar, hai que engadir a longa cola dos esquiadores para o aluguer de material, laiándose os usuarios do pouco persoal de atención ao público e do trato recibido, sendo presentadas non poucas queixas por escrito diante dos xestores do servizo.

A xestión da Estación de Montaña de Manzaneda segue sendo moi deficiente, amais dun foco continuo de problemas, porén que esta representa un fito único na nosa provincia e en Galicia, un activo turístico de primeira orde cun elevado potencial dinamizador económico. A estación alberga amplas posibilidades para actividades de montaña tanto no verán coma no inverno, resultando incomprensible que non se aproveite eficientemente a súa capacidade, nin sequera cando hai neve. Alén das posibilidades de desenvolvemento que a Estación de Montaña de Manzaneda supón para as comarcas de Trives, Valdeorras e todo o oriente ourensán, e malia o inxente investimento público consentido nas últimas décadas, unido aos sucesivos intentos de mercantilización a prol dunha pretendida xestión máis eficaz e acaída coas esixencias do sector, o complexo segue a estar desaproveitado. Tal estado de cousas amosa, no mellor dos casos, a incapacidade de xestores e accionistas. No peor dos escenarios, denota un absoluto desleixo.

É longo o catálogo de irregularidades que o Grupo Provincial Socialista ven denunciando en diferentes lexislaturas a través de mocións, preguntas e demandas de información, raramente satisfeitas polos gobernos do PP. A xestión escurantista está adobiada de anomalías con impacto na xestión da Estación, nomeadamente desde que se acordou desaloxar da toma de decisión aos concellos de Trives e Manzaneda. Entre outras deficiencias, pódese subliñar: 1) MEISA e os seus accionistas maioritarios (Xunta e Deputación) denegan sistematicamente o acceso a todos os contratos de xestión que reiteradamente teñen sido solicitados; 2) non se permite o acceso ao expediente das obras de innivación artificial; 3) nin se facilita o detalle das resolucións xudiciais que afectan á



Grupo Provincial Socialista

Rúa Progreso, 32 – 2º andar

32003 Ourense

Tlf. 988 385 203 Tlf/Fax. 988 385 178

CIF: G32244345

estación; 4) nin se accede a unha comparecencia do presidente da Deputación para dar conta da situación; 5) nin se asume a proposta socialista para que os grupos políticos integren o consello de administración de Meisa con acceso a toda a información.

A esta secuencia de deficiencias e decisións erráticas tomadas na máis absoluta das opacidades, complétase coas continuadas queixas de usuarias e usuarios da Estación, incapaz de ofrecer un servizo acaído coas necesidades dos amantes da montaña e dos deportes de neve para erixirse nun motor económico do interior ourensán. Son habituais os laios pola falta de persoal, a descoidada atención aos clientes, a falta de mantemento das instalacións, o mal funcionamento do telesilla, o aluguer de material ou a xestión dos *forfaits*. Alén do pouco acertado nas respostas aos desafíos plantexados para que a Estación deveña o foco de prosperidade que está chamado a ser, sempre en liña coa falta de transparencia arredor da xestión de Meisa, nada se sabe da “folla de ruta” do complexo, os plans de futuro e as medidas e decisións estratéxicas que deberan servir para pasar páxina de anos de despropósitos e desleixo nas instalacións de Manzaneda.

Por todo o exposto o Grupo Provincial Socialista presenta as seguintes **PROPOSTAS DE ACORDO**:

PRIMEIRA.- Instar á Deputación de Ourense na súa condición de accionista ponderado de Meisa a avanzar cara unha xestión profesional da Estación de Montaña de Manzaneda, situando á súa fronte a un equipo capaz e competente que sexa dirixido por alguén cunha demostrada experiencia no sector. Unha xestión acaída coas esixencias dun complexo de tan particulares características, pero tamén transparente, dotada dos mecanismos necesarios para que os partidos e a cidadanía poidan acceder a documentos e información sobre procedementos que desde hai anos ven reclamando o Grupo Provincial Socialista.

SEGUNDA.- Instar á Deputación de Ourense na súa condición de accionista ponderado de Meisa a dispoñer as medidas necesarias para o regreso ao consello de administración da devandita entidade dos alcaldes da Pobra de Trives e de Manzaneda, garantindo así a representatividade dos territorios nos que se asenta a Estación. Amais, sempre en aras dunha meirande transparencia, estas medidas tamén deberan garantir a inclusión dos partidos políticos de oposición no consello de administración de Meisa, tal e como ocorre en entes similares no Pirineo Aragonés e en Serra Nevada.

En Ourense, a 6 de marzo de 2024.

Asinado: Aurentino Alonso Araujo

SR. PRESIDENTE DA DEPUTACIÓN PROVINCIAL DE OURENSE

socialistaourense@gmail.com

Facebook: [PSDeGdeOurense](#)

Twitter: [@PSdeGDepOU](#)